

Sing vooraf staande: Psalm 99:5 (p. 492)

- 5 By U, HERE, is / daar vergiffenis, / ook al het u trou / nie hul straf weerhou.
Loof, verhef die HEER; / werp jul voor Hom neer! / Bring Hom roem en ere – / heilig is die HERE!

Ons hulp is in die Naam van die Here wat die hemel en die aarde geskape het.
Geliefdes, genade en vrede vir u van God ons Vader en die Here Jesus Christus deur die kragtige werking van God die Heilige Gees.

Amen.

Lofpsalm 9:9, 10 (p. 38)

- 9 Bewys aan my genade, HEER, / en sien op my ellende neer!
U, wat my aan die dood ontruk het, / kyk, hoe my haters my verdruk het!
- 10 Dan vind my tong weer nuwe stof, / in Sions poort meld ek u lof.
Dan sing ek bly van u genade, / so groot in nuwe reddingsdade.

Gebed

- *Doksologie:*
 - *Aanbidding:*
 - *Skuldbelydenis:*
 - *Vergifnis:*
 - *Dank:*
 - *Smeking vir die nood van die gemeente en voorbidding vir die kerk, owerhede en sondige wêreld, asook die beroep op die beloftes van God:*
 - *Algemene bede:*
 - *Verligting van die Gees ter wille van die Woorddiens:*
- Amen.

Psalm 25:9 (p. 117)

- 9 Slaan op my ellende u oë, / hoor my, HEER, uit medely;
neem my sondes uit meedoë / almal weg, vergeef dit my!
HEER, aanskou die leërmag / wat om my vermenigvuldig,
want hul lê op my en wag – / vol van haat en ongeduldig.

Skriflesing: Jesaja 1

Teks: Jesaja 1:27; Kategismus Sondag 5

Sion sal deur strafgerig verlos word en die van hom wat terugkeer, deur geregtigheid. (Jesaja 1:27 AFR53)

Die verlossing gaan kom deur strafgerig oor Sion, en oor die wat terugkeer kom die verlossing deur geregtigheid.

- Die Bybel praat hier van die grootste regsak ooit in die geskiedenis.
- Natuurlik moet ons onthou dat die vers soos dit hier staan 'n dubbele tydsbetekenis het.
 - Heel eerste sien dit op Israel wat deur God geoordeel gaan word, en die strafgerig wat oor hulle voltrek gaan word, is die ballingskap waarin hulle weggestuur gaan word.
 - Maar hierdie strafgerig sien ook op die eindes van die tyd – op die dag wanneer die hele wêreld deur God geoordeel gaan word en die strafgerig van die hel en die ewige dood oor die ongehoorsames voltrek gaan word.

Dit tref ons dat daar in baie duidelike woorde genade beloof word.

- Daar is verlossing moontlik in die geregtigheid van God.
- Almal word nie sonder meer veroordeel nie!

Dit draai hier om die woord *geregtigheid*.

- Ons gaan verlos word *DEUR* geregtigheid *TOT* geregtigheid.
- *Deur* geregtigheid omdat ons deur die geregtigheid van God in Christus van ons sondes verlos word.
... in wie ons die verlossing het deur sy bloed, naamlik die vergifnis van die sondes. (Kolossense 1:14 AFR53)
- En ook *tot* geregtigheid omdat God Sion onderrig sodat hy na geregtigheid van God kon lewe.

Verlossing en geregtigheid raak mekaar op drie punte:

- 1. Ons word verlos volgens die geregtigheid van God.**
- 2. Ons word nie deur eie geregtigheid verlos nie.**
- 3. Ons verlossing is op sterkte van borggeregtigheid.**

As ons aan die oordeelsdag dink, is dit altyd met vrees, en met die gedagte van vernietiging.

- Dis ook waarom ons praat van die *oordeelsdag*.
- Dit is omdat ons die handeling waarin God die ongehoorsames veroordeel en in die hel werp, as die sterkste sien.

Dis basies ook waarom ons almal die dood vrees.

- Ons vrees die gerig van die Here omdat ons eintlik almal besef hoe vol sondes ons lewe is.
- Omdat ons besef dat dit daardie oomblik nie moontlik sal wees om vir God te lieg nie.

Nou kom ons belydenis met die mooie!

- Daar is verlossing moontlik! Dis nie waar dat alle mense veroordeel word en in die hel gewerp word nie.
- Deur die geregtigheid van God gaan sekeres van ons die ewige lewe beërwe.

Daar is 'n middel waardeur ons die straf kan ontkom, en met God versoen word.

- Dit is ook wat die woord *evangelie* beteken – dit beteken *blye* of *goeie boodskap*.
- Daar is 'n blye boodskap van God af dat die uitverkorenes sy straf sal ontkom!

Die weg na God toe is deur die sonde nie vir ewig gesluit nie – maar dit kan net oopgesluit word deur vir die swaar skuld las teen God te betaal.

- Daar staan tog dat God wil dat aan sy geregtigheid voldoen moet word. God se geregtigheid betrek sy hele wese.
- Dit gaan daarin om die heiligheid van God.
 - Dit gaan om die waarheid en alles wat deur God as waar en reg beskou word.
 - Dit betrek selfs die majesteit van die Here.
 - Dit raak die eer van God.

God het juis reg en geregtigheid vasgestel om daarmee sy heiligheid aan te toon en om ook daarmee sy heiligheid te handhaaf teenoor alle vorme van kwaad of selfs die werk van die satan wat God se heiligheid probeer skend.

Die eer van die Here sou verval het as Hy die sondaars sommer net so teruggeneem het.

- Die hele kwessie van waarheid by God sou dan ook verval.
- Wat sou dit baat om 'n standaard van waarheid te hê maar nog die sondaars in jou koninkryk te ontvang wat hulle aan God se eis van waarheid nie gesteur het nie?
- So 'n god sou inderwaarheid geen eer werd wees nie!

Daarom het God geen keuse nie. Hy moet die ongeregtigheid straf as dit bedryf word. Ons lees in Jesaja 5:16:

Maar hoog sal die Here van die Leërskaare wees deur die strafgerig en die heilige van God sal Hom as die Heilige laat ken deur geregtigheid. (Jesaja 5:16 AFR53)

Ons kan dus slegs in die hemel kom net as daar aan die reg van God wat geskend is, reg geskied kan laat word.

Die probleem is dat God se geregtigheid eis dat daar in geen opsig van sy reg afgewyk mag word nie omdat die geregtigheid 'n deel is van God se wese.

- Die geregtigheid eis dus dat elke oortreder van God se wet gestraf moet word.
- Die geregtigheid eis absolute gehoorsaamheid van almal.

Die enigste weg van verlossing vir die sondaarmens is om aan God se geregtigheid te voldoen. Daar moet volkome betaal word.

- Met dank aan God sluit die wet gelukkig nie die moontlikheid uit dat daar deur 'n ander betaal kan word nie!
- Dit is juis die vrug van God se goedheid dat daar 'n Verlosser voorsien kan word!

Romeine 3:25, 26 skryf hiervan dat die Here Jesus juis daarom deur God voorgestel is in sy bloed as 'n versoening deur die geloof.

- En dat Hy juis die geregtigheid van God bewys het deur die sondes wat onder die lankmoedigheid van God gedoen is, aan Hom te straf.
- Daarin maak Hy diegene regverdig wat in Jesus Christus glo.

Of 2 Korintiërs 5:21 waar daar geskryf staan dat God 'n Borg voorsien het vir ons.

- Hy het Hom wat geen sonde geken het nie, sonde vir ons gemaak, sodat ons deur Hom in die geregtigheid van God kon deel.

In die tweede plek handel hierdie Kategismus Sondag oor ons eie geregtigheid.

- Onomwonde duidelik en hard word dit dan gestel dat geregtigheid van ons kant af by God totaal onmoontlik is.
- Ons kan nie geregtigheid by God bewerk nie – ons maak net ons skulde daaglik meer.

Dit is eintlik 'n seer puntjie wat hier aangeroei word.

- Ons almal is mos maar in 'n mate verwaand en daarom hou ons nie daarvan dat ons eie geregtigheid so tot in die grond toe afgebreek word nie.
- Ons wil maar eintlik glo dat ons tog tot die goeie in staat is en dat ons tog dinge kan doen wat tel by God.

Die uiterste geval van sulke eie geregtigheid het ons natuurlik by die Jode gekry in die tyd van Christus.

- Hulle het die Tien Gebooie geneem en hulle het nog 'n paar duisend wette gaan byvoeg.
- So geweldig baie dat hulle geglo het dat as hulle hul eie bywette onderhou, die Tien Gebooie ongeskonde onderhou sal word.
- Maar op dié manier het hulle die Tien Gebooie heeltemal vergeet, en net hulle eie gebooie onthou.

Daarom kon hulle dit net nie aanvaar of verwerk dat Jesus hulle as vals en as witgepleisterde grafstene uitgeskel het nie.

- Hulle kon net nie glo dat hulle nie self die paadjie hemel toe kon bou met hulle eie goeie werke nie.
- Want met Jesus se prediking van die wet het hulle goeie werke waarin hulleself so belangrik was, in duie gestort.

Die Here veroordeel eiegeregtigheid in sy kerk omdat dit die geloof van die Godskind verkanker.

- Dit laat ons meer van onself glo as waartoe ons hoegenaamd in staat is.
- Job het al hierdie waarheid besef toe hy uitgeroep het:

Waarlik, ek weet dat dit so is; en hoe kan 'n mens regverdig wees by God?
(Job 9:2 AFR53)

Dan vertel Job dat ons nie eers 'n berg kan versit nie en ook nie eers die son kan uitblus nie.

- Hoe sal ons onself voor God kan regverdig, want Hy het die berge laat ontstaan waar hulle is en Hy het die son gemaak en hou dit in stand.
- Ons het teen die toorn van God uit onself geen krag nie!

Die saak is nog erger! Ons werk inderwaarheid negatief.

- Ons is net nie in staat om onself te verlos nie, maar ons vergroot ons sondeskuld steeds elke dag.
- *Ons maak selfs die skuld nog daaglik meer, sê die Kategismus. Christus het self ook gevra: Wat sal die mens gee as losprys vir sy siel?*

Ons kan met ons geregtigheid nooit 'n volledige gehoorsaamheid voor God bereik nie!

- Ons kan onself nie help nie; ons is ons eie struikelblok.
- Ons trane en ons opofferinge en offers aan die Here bewerk nie ons geregtigheid nie. Maar as ons nie ons offers bring nie, dan bewerk dit ons oordeel!

Eintlik is die dinge baie logies, want as ons in staat was om onself te verlos, was onself God. Dan het die hel buitendien nooit 'n bedreiging vir ons ingehou nie!

Daarom die derde vraag wat leer dat daar wel 'n manier is waarop daar vir ons geregtigheid by God is.

- Daar moet net iemand gevind word wat in ons plek die oordeel van ons sondes sal dra.
- Jesaja skryf al in hoofstuk 63:1 dat Hy 'n Verlosser met bloedrooi klere sien kom wat God is, en wat magtig is om te verlos.
- Die bloedrooi klere leer ook dadelik van die bloed van Christus wat sou vloei.

Nou moet u eers oplet watter geweldige eise aan hierdie Verlosser gestel word.

- In die eerste plek moet Hy 'n mens wees, want God straf nie 'n ander natuur as die een wat gesondig het nie. Dit staan in Hebreërs 10:4 geskrywe.
 - Stiere en bokke kan onmoontlik die sonde van die mens wegneem.
- En in vers 5 dat die Here juis 'n liggaam berei het waaraan die sonde gestraf kan word.
 - Die offers was slegs herinneringe aan die sondes en profesieë dat iemand uiteindelik daarvoor sou betaal.

Dit is die eenvoudige rede waarom daar nie 'n engel kon kom om vir ons gestraf te word nie, want hulle is andersoortige wesens.

- Dis ook waarom daar nie vir hulle vergewing van sondes moontlik is nie, want Christus sterf as mens en nie as 'n engel nie!
- 'n Engel is ook nie onder die wet gebore nie en die Een wat ons met God sou versoen, moes juis onder die wet gebore wees!

Die Verlosser moes dus logies 'n mens wees wat deur wetsonderhouding die guns van God herstel.

- Dit sou nie veel help as die Versoener net 'n goeie mens is nie, want 'n mens kan nie die dood oorwin nie.
- Om 'n goeie mens vir die ander te laat boet, sou maar net prakties beteken dat 'n goeie mens uit die lewe weggeneem word, want hy sal steeds nie die dood kan oorwin nie.

'n Mens alleen kan ook nie ander skuldiges verlos nie, want die persoon wat die verlossingswerk moet doen, moet juis die dood kan oorwin. Daar is 'n rede voor.

- Die dood is juis 'n vloek wat deur God ingestel is – dit was die straf op die sonde.
- Dis die simbool daarvan dat God ons verwerp omdat ons nie gehoorsaam is nie.

Daar moes iemand kom wat die vloek uit die dood uithaal. Met ander woorde, iemand wat self die vloek moes dra.

- As dit sou gebeur, dan sou die dood nie meer die hel as eerste gevolg hê nie, maar dan sou die dood net 'n deur word waardeur ons uit hierdie wêreld in die wêreld hierná ingaan.

Die verlosser moes ook nog 'n eienskap hê.

- Hy moes die mag hê om te verseker dat die borgskap wat hy bied, geldig is by God.
- Daarom is Christus gebore – die Seun van God. Of soos Johannes dit stel: Die Woord van God het vlees geword en onder sy mense kom woon.

Daarom realiseer ons verlossing so mooi in Christus.

- Hy sterf as mens. Maar hy borg ook die verlossing as God, want Hy kom uit die dood uit terug in die lewe.
- Selfs die grafte rondom Jerusalem het party oopgebreek en van die mense het uit die dood opgestaan en aan die mense in die stad kom verskyn.
- Daarmee lewer Jesus al dadelik die bewys dat Hy ons ook so uit die dood sal terugbring.

Die verdere bewys van die beslistheid waarmee God ons deur hierdie Middelaar verlos, is die feit dat die Gees van God na sy hemelvaart teruggekeer het om in ons te woon. Toe met die doel om die verlossing in ons hart en verstand te realiseer.

Hoe kom ons dan in die hemel? Paulus antwoord in Romeine 1:16, 17: Deur die geloof in hierdie Jesus Christus alleen.

Kom ons gaan kyk wat leer die Heidelbergse Kategismus van al hierdie dinge:

Vraag 12: Aangesien ons volgens die regverdige oordeel van God die tydelike en ewige straf verdien het, hoe kan ons van hierdie straf bevry en weer in genade aangeneem word?

Antwoord: God wil dat daar aan sy geregtigheid voldoen word (a). Daarom moet ons òf deur onself òf deur 'n ander ten volle betaal (b).

(a) Gen 2:27; Eks 23:7; Eseg 18:4; Matt 5:26; 2 Tess 1:6; Luk 16:2. (b) Rom 8:4.

Vraag 13: Kan ons deur onself betaal?

Antwoord: Nee, glad nie; ons maak juis ons skuld elke dag nog groter (a).

(a) Job 9:2; 15:15, 16; 4:18, 19; Ps 130:3; Matt 6:12; 18:25; 16:26.

Vraag 14: Kan enige ander skepsel vir ons betaal?

Antwoord: Nee, want Ten eerste wil God aan geen ander skepsel die skuld straf wat die mens gemaak het nie (a). Ten tweede kan geen gewone skepsel die las van die ewige toorn van God teen die sonde dra en ander skepsels daarvan verlos nie (b).

(a) Eseg 18:4; Gen 3:17. (b) Nah 1:6; Ps 130:3.

Vraag 15: Hoe 'n middelaar en verlosser moet ons dan soek?

Antwoord: So een wat 'n ware (a) en regverdige (b) mens is, maar nogtans ook sterker as alle skepsels is, dit wil sê wat terselfdertyd ware God is (c).

(a) 1 Kor 15:21; (b) Heb 7:26. (c) Jes 7:14; 9:5; Jer 23:6; Luk 11:22.

Amen.

Slotgebed

Slotpsalm 66:2 (p. 320)

2 Die aardryk met sy verste lande / moet biddend voor die HERE buig;
die volke van die verste strande / moet met hul lofstem voor Hom juig.
Kom en aanskou Gods wonderdade, / wat is sy werking hoog gedug.
Smeek Hom, o volke, om genade, / want niemand kan sy hand ontvlug.

Die genade van die Here Jesus Christus en die liefde van God en die gemeenskap van die Heilige Gees bly by u almal.

Amen.

Dr MJ du Plessis
Hulpdienspredikant
Gereformeerde Kerk Clanwilliam
Datum: 21 April 2013